

COLUMNA

Trais metodas per cuntanscher ina finamira

JOST FALETT


Danunder che jau hai las «Trais metodas...» na sai jau betg pli – i ma paran dentant interessantas.



La metoda dals Wikingers: Tschertgar in bun manader ed urar che tut giaja bain.

La metoda dals Wikingers è la pli simpla. Ella sa avair success, cuntegna dentant er gronds privels, quai mussa l'istorgia adina puspè. Betg mo ils Americans èn sa trump-ads cun quella metoda. Han els forsa urà memia pauc?

La metoda da la Titanic experimentain nus actualmain culla pandemia. Noss mund globalisà ha funcziunà grondius, cun creschientscha cuntinuanta e gudogns maximalis. Chadai-




La metoda da la Titanic: Planisar tut fin il davos detagl ed in impediment nuspetgà maina a la catastrofa.

nas da furniziun optimadas tras tut il mund – las rodas dentadas da Honkong fin Kapstad e Chicago giravan stupend ina en l'otra. Enfin che il pitschen virus ha mussà ils cunfins. Er la dependenza è globala, schizunt en nossa medicina svizra, malgrà Novartis e Roche.

La metoda da Columbus savess esser adattada er per la Rumantschia.

a. Tgenina è la finamira globala che mussa la direzziun? Sa chapescha: il rumantsch duai surviver. Nua-

essan nus arrivads suenter passa 2000 onns lingua discurredda e sur 450 ons lingua scritta? Tanschi per anc in pèr tschientaners? È la finamira da mantegnair tut ils idioms sco lingua scritta realistica? Surviva il rumantsch er be sco lingua discurredda – quant ditg e cun tge consequenzas?



La metoda da Columbus: a. Avair ina finamira globala che mussa la direzziun. b. Enconuscher ils problems futurs. c. Avair ils instruments per determinar adina danovamain l'atgna posiziun.

b. Problems futurs: Cun vents e burascas ha la Rumantschia ritga experientscha. Esi dad evitar quellas? Sa chapescha ch'igl è pli agreabel da viver ruassaivel ed en pasch. Per surviver dovri dentant er il disput e mintgatant schizunt la confruntaziun. Survivì han quels che han cumbattì. In pievel sa er murir en pasch.

Qualitads umanas: «Salver ans salvarons be, scha nus essans pronds da'ns salver sves, scha'l saung cuorra cun ardimaint tres nosas avainas», ha ditg gia Reto Caratsch. Il fiue intern è plitost ina flommetta. L'amur per la lingua na tanscha betg sur l'agen idiom ora – ch'i dat Rumantschas e Rumantschs er en vals vischinas interessa paucs. Be per amur da la lingua na vegn betg abunada La Quotidiana. Er per nus vala: pli pitschen che nus essan, e pli che nus ans isolain.

Meds disponibels sper las finanzas: gida la ferma basa legala a surviver?

Il nov post da coordinaziun tar il chantun è in pitschen pass. Il rumantsch grischun ha fitgà pe – cun in pau pli pauca forza – er senza la scola. Nus giudain grondas simpatias en Svizra e schizunt sur quella ora, sco che Cassis ha mussà cun l'emna rumantscha: «In ferm toc Svizra»! Maina quai er ad «in ferm toc vischnanca», quai ch'è decisiv per surviver? E la digitalisaziun tant ludada? Las schanzas èn evidentas. Tge munta quai dentant per nossa cuminanza, sche nus faschain tut online, sche butias/stizuns, posta e banca serran? Na viva il rumantsch betg da la cuminanza en nossas vischnancas?

C. Determinar l'atgna posiziun: Tge ch'è sta ils davos 50 onns savain nus. Ils territoris rumantschs a l'ur s'èn diminuids cuntinuamain: la Tumleatga, la Mantogna, vischnancas sco Panaduz e Bravuogn èn quasi persas, la Sutselva e l'Engiadin'Ota èn flaiavas, cun pauca preschientscha rumantscha.

Per il mument dattan nossas medias il meglier vent al moviment rumantsch. E nus avain ina ferma scena musicala e litterara. Ed il potenzial da la diaspora? Vegn en la diaspora il rumantsch dat enavant sur pliras generaziuns?

Co cuntinuar? Rumantschas e Rumantschs n'han betg il fiue intern dals Gidieus, che han mantegnì lur lingua sur tschientaners er senza territori. Surviver sa il rumantsch be en il territori da tschep – quel è decisiv.

Jost Falett, Bever, è stà scolast da biologia e rumantsch a l'Academia ed ils onns 1997–2003 president da la Lia Rumantscha.